

KI JINGSHISHA SHAPHANG KA SABBATON BAD KA SNGI NYNGKONG

LAIPHEW TYLLI KI JINGSHISHA NA KA BAIBL SHAPHANG KA SABBATON KA SNGI BAHYNÑIEW (SNGI SAITJAIÑ).

Mano ba la thaw bad pynlong ia ka sngi Sabbaton? Balei? Ia kano ka sngi ka Baibl ka iathuh ia ngi ba ka long ka sngi Sabbaton jong U Blei? Hato ka lah mo ban long ka jingshisha ba ia ka sngi Sabbaton jong ka sngi ka bahynñiew la lah pynduh pyndam noh na ka bynta jong ngi ki Khristan? Tad haduh lano ka Sabbaton kan iaisah?



(Sngewbha buh jingkyrmaw: Ha kane ka artikel, ngi la buh tang ia ki mat bakongsan ba ngi lah ban pyrkhath da kaba ianujor kawei ka jingthoh bakhuid bad kawei pat. ki jingthoh jong ka kotbah ym shim la thoh, hynrei ngi la shu buh jingkdew. Bad ngi pynshlur jur ia phi ban plied ia ka kotbah khnang ba phin tip ka ktien U Blei ka ong aiu.)

Hangne ngi shem laiphewsan tylli ki jingshisha na ka Baibl shaphang ka sngi Sabbaton:

- 1) U Blei u la shong thait noh ha ka sngi kaba hynñiew hadien ka jingpyllut por jong U ia ki hynriew sngi kiba sha khmat jong ka taiew ban thaw ia ka pyrthei – **Jenesis 2:1-3.**
- 2) U Blei uba long U Nongthaw U la kyrkhu ia ka sngi kaba hynñiew – **Jenesis 2:3.**
- 3) U Blei U la kyntang khuid (pynlong khuid) ia ka sngi kaba hynñiew - **Jenesis 2:3; Eksodos 20:11**
- 4) U Blei U la pynlong ia ka Sabbaton jong ka sngi kaba hynñiew naduh kper Eden – **Jenesis 2:1-3.**
- 5) U Blei u la pynlong ia ka Sabbaton shuwa ba ka pop ka ioh bsut sha ka pyrthei. Namar kata, ia ka Sabbaton la lah thmu lypa na ka bynta u briew baroh – ym tang na ka bynta ki Jiw. U Jisu u ong, la thaw ia ka Sabbaton na ka bynta u briew baroh – **Markos 2:27.**
- 6) Ha ka Baibl ym shym la kdew ba ka Sabbaton ka long ka Sabbaton tang na ka bynta ki Jiw. Pynban, la khot ia ka ka Sabbaton jong U Trai – **Eksodos 20:10.**
- 7) Ka Sabbaton jong ka sngi kaba hynñiew ka long ka jingbuh jingkyrmaw ia ka jingpynlong

(Creation). Man ba ngi shongthait ha ka sngi kaba hynñiew, kumba U Blei U la leh ha ka Jingpynlong (Creation), ngi pyndonburom ia ka Jingpynlong bad ia ka bor Jingpynlong jong U Blei – **Eksodos 20:11; Eksodos 31:17.**

8) Ka Sabbaton ka long shibynta na ka Hukum U Blei ha shuwa ba u Moses un iohpdiang ia ki Shiphew Hukum halor u Lum Sinai – **Eksodos 16:4,5, 22-30.**

9) U Blei U la buh janai ia ka Sabbaton jong ka sngi kaba hynñiew hapdeng jong ki Shiphew Hukum jong U. Ka hukum Sabbaton ka dang iai long kaba donkam bad kaba dang iai teh na ka bynta u Khristan kumjuh kum kita kiwei pat ki khyndai tylli ki hukum – **Eksodos 20:1-17.**


10) U Blei u la hukum ban sumar ia ka Sabbaton ka sngi kaba hynñiew da la ka jong ka sur kren, ia kaba la kren na bneng hi – **Deuteronomi 4:12,13.**

11) U Blei u la thoh ia ka hukum Sabbaton ha u maw-lyngkniap da la ka jong ka shynriahti – **Eksodos 31:18.**

12) Ia ki Shiphew hukum kiba kynthup ruh ia ka hukum Sabbaton jong ka sngi kaba hynñiew la buh kyrpang khuid hapoh ka synduk jutang ia kiba la buh pat ha ka jaka kyntang tam jong ka tabernakl jong U Blei – **Deuteronomi 10:1-5.**

13) U Blei u dawa ia ka jingrakhe ba thikna ia ka Sabbaton ka sngi kaba hynñiew, da kaba ban jur ba ngin shongthait ha ka, wat lada don ka kam kaba kyrkieh katno katno ruh. – **Eksodos 34:21.**

14) Ka jingtamsneng ia ka hukum Sabbaton ka la wanrah ia ka jingiap ha ki briew jong U Blei, ki khun Israel, mynba ki iaid lynti lyngba ka ri khlaw – **Esekiel 20:12,13.**

15) U Blei u ong ba ka jingrakhe ia ka Sabbaton ka sngi kaba hynñiew ka long ka dak ba ngi ithuh ia U kum U Blei jong ngi hi. **Eksodos 31:13; Esekiel 20:20.**  **Ka dei ka dak ba ngi pynithuh ialade bad Uwei “U Blei uba shisha”, bad Une u dei “U Blei bad U Kpa jong U Jisu Khrist”. Ioannis 17:3; 5:18; 1 Korinth 8:6; Ephesos 1:3.**

16) U Blei u ong ba ka Sabbaton ka sngi kaba hynñiew ka long ka dak ba U la pynim bad pynkyntang ia ngi – **Eksodos 31:12,13.**

17) U Blei u la kular ba ka Nongbah Jerusalem kan iaineh junom tang lada ki briew jong U ki ngeit bad sumar khuid ia ka Sabbaton jong U – **Jeremaiah 17:24, 25.**

18) Ki briew jong U Blei ki la hap mad ia ka jinglongmraw hapoh Babilon namar ba ki la lyndet noh ban sumar ia ka Sabbaton bakhuid U Blei – **Nehemaiah 13:17,18.**


19) Ia ka Nongbah Jerusalem hyndai la pynjot noh namar ba ki briew U Blei ki la lyndet noh ban sumar ia

ka Sabbaton bakhuid jong U – **Jeremaiah 17:27.**

20) U Blei u theh ia ka jingkyrkhu bakyrpang halor ki Jentil- kibym dei ki Jiw – kiba rakhe khuid ia ka Sabbaton bakhuid jong U – **Isaiah 56:6,7.**

21) U Blei u kular ban theh buk ki jingkyrkhu ha uno uno uba sumar ia ka Sabbaton bakhuid ka sngi kaba hynñiew – **Isaiah 56:2.**

22) U Blei u kyntu ha ngi ban kheiñ ia ka Sabbaton “*ka jingsngewbha*” bad “*kaba donburom*” bad U kular ia ngi ba Un kyrkhu ia ngi lada ngi leh kumta – **Isaiah 58:13,14.**



23) U Jisu hi u la sumar ia ka Sabbaton ka sngi kaba hynñiew katba U dang im kum u briew ha kane ka pyrthei – **Loukas 4:16; Ioannis 15:10.**

24) Ka Sabbaton ka sngi kaba hynñiew ka dei ka sngi U Trai, ka long ka jong U – **Markos 2:28; Eksodos 20:10; Isaiah 58:13; Jingpynpaw 1:10.**

25) U Jisu u ong ba U long U Trai jong ka Sabbaton, namarkata ka dei ruh ka dak ba ngi pynithuh ialade bad U Jisu, Uba long “*U Khun ba la kha marwei*” jong U Blei” – **Markos 2:28. Ioannis 3:16.**

26) U Jisu u la iai kyrshan ia ka Sabbaton kum ka nongrim jong ka jingisnei ia kaba la saiñdur na ka bynta ka jingbha kor tam jong u khun bynriew baroh – **Markos 2:23-28.**

27) U Jisu Um shym la wan ban pyndam noh ia ka Sabbaton, pynban U la hikai janai kumno ba ka dei ia ngi ban sumar khuid ia ka - **Mathaios 12:1-13.**

28) U Jisu, da kaba shai kdar, U la ong ba U la wan ym ia kaban ioh pyndam noh ia ka Hukum kaba kynthup ia ka hukum Sabbaton – **Mathaios 5:17-19.**

29) U Jisu U la hikai ba ka dei ia ngi ban leh ia ki kam babha ha ka sngi Sabbaton – **Mathaios 12:12.**

30) U Jisu u la iathuh ha la ki synran ba ka dei ia ki ban iai buh jingkyrmaw ba ka Sabbaton ka long kaba donkam ha ka por ba ia ka Nongbah Jerusalem yn sa pynjot noh – ka jingjia kaba la jia sawphew snem hadien ka jingiap bad ka jingmihpat jong U – **Mathaios 24:15-20.**

31) Ki kynthei kiba ju long ki nongbud U Jisu katba U dang im ha kane ka pyrthei ki la sumar bniah ia

ka Sabbaton ka sngi kaba hynñiew wat hadien ka jingiap jong U – **Loukas 23:55,56.**

32) Ka Baibl ka pynpaw thikna ba ka Sabbaton ka sngi kaba hynñiew ka la dei ka sngi kaba don hapdeng ka sngi (sngi Thohdieng/Sngi Pynkhreh) jong ka jingsah narphna ia U Jisu bad ka sngi (Sngi Sunday/Sngi Nyngkong) jong ka jingmih pat jong U Jisu – **Loukas 23:50; 24:1.**

33) U Apostol Paul u la sumar ia ka Sabbaton ka sngi kaba hynñiew hadien jong ka jingiap bad ka jingmihpat jong U Jisu- **Ki Kam 13:14, 42-44; 16:13; 18:4.**

34) Ka la ju long ka rukom bad ka jingmlien jong U Apostol Paul ban mane ha ka Sngi Sabbaton ka sngi kaba hynñiew – **Ki Kam 17:2,3.**

35) Ia ka Sabbaton yn iai sumar khuid ha bneng (pyrthei bathymmai) lynter ki bymjukut – **Isaiah 66:22,23.**

Ka Sabbaton ka dei ka sngi ha kaba ngi don ka jingiasyllok lem bad U Blei U Kpa bad U Jisu Khrist, U Khun ba la kha marwei jong U.



“Ia kata kaba ngi la iohi bad ngi la iohsngew ngi iathuh shai ha phi, ba ma phi ruh phin ioh ka jingiasyllok lem bad ngi: bad kata ka jingiasyllok de ka jong ngi ka long lem bad U Kpa bad U Khun jong u ruh U Jisu Khrist.” 1 Ioannis 1:3

KA JINGRAKHE SABBATON	KA JINGRAKHE SUNDAY
1. Ka dei ka dak sha U Blei	Kam dei ka dak sha U Blei
2. La rakhe da U Jisu & ki Apostol	Ym shem la rakhe da U Jisu & Ki Apostol
3. La thoh ha ka ktien U Blei & Ki Hukum Jong U.	Ym shem la thoh ha ka ktien jong U Blei & Ki Hukum jong U.

SHIPHEW TYLLI KI JINGSHISHA NA KA BAIBL SHAPHANG KA SNGI BANYNGKONG (SUNDAY) JONG KA TAIEW.

Hato ka Baibl ka buh jingkyrmaw mo ia ka jingkylla ka Sngi Sabbaton na ka sngi kaba hynñiew jong ka taiew sha ka sngi kaba nyngkong? Hato ki apostol ki rakhe ia ka Sngi Sunday? Hato ia ki Khristan la hukum ban rakhe khuid ia ka Sngi Sunday kaba long ka sngi nyngkong jong ka taiew hadien ka jingmihpat jong U Jisu? Ha ka jingshisha, ka Baibl ka don tang khyndiat eh ban kren shaphang ka sngi banyngkong jong ka taiew (ia ka ktien 'Sunday' ym shem ha ka Baibl, lait noh tang ha ka Goodnews Bible).



Hangne harum don shiphew tylli ki jingshisha na ka Baibl shaphang ka sngi banyngkong jong ka taiew:

- 1) Ka jingbuh jingkyrmaw kaba nyngkong eh ha ka Baibl shaphang ka sngi kaba nyngkong jong ka taiew ka long ba ka sngi kaba nyngkong ka dei ka sngi ha kaba ia ka kam la leh – ka sngi ha kaba U Blei U la sdang ban thaw bad pynlong ia ka pyrthei (Creation) ka la long ka sngi kaba nyngkong. **Jenesis 1:1-5.** Ym don kaei kaei ruh kaban pyniakhlad kyrpang ia ka sngi kaba nyngkong na kiwei pat ki sngi trei kam jong ka taiew Jingpynlong.
- 2) U Blei u hukum ia la ki briew ban trei ia la ki jingtrei ha ka sngi kaba nyngkong jong ka taiew kum shibynta jong ki hynriew tylli ki sngi ban trei jingtrei – **Eksodos 20:8-11.**
- 3) U Blei u kdew kyrpang ia ki hynriew sngi ban trei jingtrei ha ka shitaiew – kiba kynthup ruh ia ka sngi kaba nyngkong – da kaba pynpher ia ki bak-ly-bak na ka sngi bakhuid jong U, ka Sngi Sabbaton – **Esekiel 46:1.**
- 4) Ym shym la buh jingkyrmaw hangno-hangno ruh ha ka Baibl ba U Blei u la kyrkhu ia ka sngi kaba nyngkong lymne ba U la kyntang khuid ia ka.
- 5) Ym shym buh jingkyrmaw hangno-hangno ruh ha ka Baibl ba ki kpa tymmen, ki nongiathuhlypa, ki apostol lane kino kino ki briew jong U Blei ba ki la iapdiang ia ka sngi kaba nyngkong (Sunday) jong ka

taiew kum ka Sabbaton jong U Blei lane ba ki la ju rakhe khuid ia ka.

- 6) Ym don kano kano ka hukum na U Blei ha kano kano ka bynta jong ka Baibl ban rakhe khuid ia ka sngi ba nyngkong jong ka taiew.
- 7) Ka Baibl ka sngap jar-jar shaphang ka jingpynkylla ia ia ka Sabbaton bakhuid U Blei na ka sngi kaba hynñiew jong ka taiew sha ka sngi kaba nyngkong.
- 8) Ka Bible ka iathuh ba ki kynthei ki la wan sha ka jingtep jong U Jisu dang step phyrngab ha ka sngi banyngkong jong ka taiew- hadien ba ka Sabbaton ka sngi ka ba hynñiew ka la kut noh. **Mathaios 28:1; Markos 16:1.2 .**
- 9) Ka Baibl ka buh jingkynmaw tang shisien ha kaba ki Khristan ki la ialum lang ban “kdiah kpu” bad ruh ban iohsngew ia ka jingialap u Apostol Paul ha ka sngi nyngkong jong ka taiew (**Ki kam 20:7**). Ka buh jingkynmaw ruh ba ki parabangeit Khristan kiba mynnyngkong ki ju ialum lang man la ka sngi ban kdiah kpu (pynlong ia ka jingiabam lang) bad ban ai ka jingiaroh ia U Blei (**Ki Kam 2:46,**

47). Ym don ei ei ruh shaphang ka jingialang ba la thoh ha **Ki Kam 20** kaba pyni ba kine ki Khristan ki la kheñ ba ka sngi banyngkong jong ka taiew ba ka long kaba khuid ne ba U Blei u la pynkynriah ia ka Sabbaton na ka sngi kaba hynñiew jong ka taiew sha ka sngi kaba nyngkong.

- 10) U Paul u la bthah ia ki parabangeit ha Korinth ban buh kyrpang ia ka pisa jingkynshew ha lade (ne ha la iing) shimet shimet man la ka sngi nyngkong jong ka taiew (**1 Korinth 16:2**) khnang ba yn ym hap pyrkhath pat katno yn pynnoh synniang sha ka jingkynshew tang ynda u la poi ma u ha Korinth. Don katto katne kiba pyni nia ba kane ka dkhot ka pynpaw ba ki Khristan ha Korinth ki la ia mane lang ha ka sngi kaba nyngkong jong ka taiew bad ba ki la ialum jingkynshew ha kita ki por jingia-mane lang. Hynrei kane ka dkhot ka kren shai shaphang ka jingbuh lypa ia ka pisa man la ka taiew khnang ba U Paul un ioh lum ia ka haba u wan; kam shym la kren ei ei shaphang ka jingia-mane lang ha ka sngi kaba nyngkong jong ka taiew.

Ka ktien jong me ka long ka sharak ia ki kjat jong nga, bad ka jingshai ha ka lynti jong nga. Salm 119:105

Ka jingthmu ha kaba iadei bad ka kam thoh kam tar jong ngi kam dei na ka bynta ka kam ioh pisa, hynrei ka jingpynphriang ia ka jingshisha. Namarkata ia kine ki kot la tyrwa khlem dor. Ka jingkyrshan na ka bynta ki kot ki sla ka la long na ka jingkynshew ai sngewbha da kito kiba lah, kumba U Trai u la pynmanbha ia ki. "To kren ha ki khun Israel, ba kin wallam ha nga ia ka jingainguh: na u briew baroh uba ai sngewbha na la ka dohnud keiñ phin shim ia kita ki jingainguh jong nga." Eksodos 25:2. Ka tyngka kaba mih kan leit sha ka jingpynsaphriang ia ka Gospel sha kiwei pat. Namar ba kine ki lad jingiarap ki long kiba ioh ei, ngi pynshlur jur ia phi ban iasam bad kiwei pat, tang ia kiba phi lah ban kot bor. U soitan um ju shongthait ban ialeh pyrshah ia ka jingshisha jong U Blei, namarkata ngi kyrpad ia ka jingkyrshan jong phi ha ka jingdwai ha khmat U Trai.

NA KA BYNTA KIWEI PAT KI JINGPULE:

- **'Ka Jingshisha shaphang U Blei'** Ki jingkylli bad ki jubab bashongnia halor ka jingtip shaphang U Blei, U Jisu bad U Mynsiem Bakhuid. Tang na ka Baibl bad tang na ka Baibl hi.
- **'Ki Mawjam sha U Khrist'** Ka kot bashem mynsiem shaphang ka jingieit bah U Blei bad ka jingpynim ei jong U. Kumno ngin long Khristan, kumno ngin im bad san, kumno ngin iaineh bad kmen ha U Trai ki la long ki mat bakongsan jong kane ka kot.
- **'Hato don ne em U Blei?'** Kane ka kot lyngkdop kaba pyni ia ka sakhi sabut baskhem ba U Blei uba donbor u don shisha bad U dawa ia ka jingshaniah.
- **'Jia aiu ia kiba iap?'** Kane ka kot lyngkdop ka kren shaphang ka jingiap bad kaei kaba jia ynda haba u briew u dkut mynsiem.
- **'Uei U Mikhal U Angel Rangbah?'** Ka jingpule shaphang Une u angel uba don ka jingiadei kaba jan bad U Blei, ka pynskhem ia ka kyrdan jong U Khun U Blei kum Uba kynja-blei.
- **'Ka Jingwan arsien U Jisu Khrist, part1 & part2.'** Ha ka part1 la pyni shaphang ka jingwan kloï bad ka rukom wan jong U Jisu, bad ia ki jingjia ha kane ka por. Bad ha ka part2 pat la kynthoh ia ki jinghikai bakla bad la pynshai shuh shuh ia ka jingshisha ba la batai ha ka part1.

Phi lah ban ioh ei ia kine ki lad jingiarap bad shuh shuh da kaba pyntip ia ngi:

***Pyntip ia ngi:**

Phone no: +91 8974262391, +917005673218, +918258877230

Internet: www.christinyouministry.info

Email: ciyministries04@gmail.com

Christ In You Ministries
Khasi Hills, Meghalaya, India